

HOTUBA YA KATIBU MTENDAJI WA BARAZA LA TAIFA LA UWEZESHAJI
WANANCHI KIUCHUMI WAKATI WA UFUNGUZI WA MAONESHU YA
MIFUKO YA UWEZESHAJI YATAKAYOFANYIKA KATIKA VIWANJA VYA
BOMBADIA SINGIDA
KUANZIA TAREHE 08-14 SEPTEMBER, 2024

- *Mheshimiwa William Lukuvi, Waziri wa Nchi, Ofisi ya Waziri Mkuu, Sera, Bunge na Uratibu;*
- *Mheshimiwa Halima Dendego, Mkuu wa Mkoa wa Singida;*
- *Dkt. Fatma Mganga Katibu Tawala wa Mkoa wa Singida;*
- *Viongozi mbalimbali wa Vyama vya Siasa;*
- *Wakuu wa Vyombo vya Ulinzi na Usalama;*
- *Wakurugenzi wa Halmashauri mliopo;*
- *Wawakilishi wa Mashirika ya Kimataifa;*
- *Wakuu wa Idara na Taasisi mbalimbali za Serikali;*
- *Wakuu wa Taasisi zinazosimamia Mifuko na Programu Uwezeshaji Wananchi Kiuchumi za Serikali na za sekta binafsi;*
- *Wawakilishi kutoka katika Taasisi mbalimbali za sekta binafsi;*
- *Waratibu wa Uwezeshaji wa Wananchi katika Uwekezaji;*
- *Wanahabari;*
- *Wageni Waalikwa;*
- *Mabibi na Mabwana.*

Jamhuri ya Muungano wa Tanzania!

Mheshimiwa Mgeni Rasmi,

Awali ya yote ninapenda kutumia nafasi hii kumshukuru Mwenyezi Mungu kwa kutupa uzima na kuweza kukutana leo hapa Singida ikiwa ni Maonesho yetu ya 7 ya Mifuko na Programu za Uwezeshaji. Pia nakushukuru wewe Mgeni Rasmi, kwa kukubali kutufungulia Maonesho haya. Aidha, nawashukuru viongozi na watumishi wa Ofisi ya Mkuu wa Mkoa wa Singida chini ya Uongozi Mheshimiwa Mkuu wa Mkoa kwa ushirikiano mkubwa katika kuandaa Maonesho haya na pia kwa makaribisho mazuri mkoani Singida. Nawashukuru pia wote walioalikwa na kuweza kuja kushuhudia ufunguzi wa Maonesho haya. Tunatambua kuwa nyote

mnayo majukumu mengi mliyopanga kuyafanya siku ya leo lakini pamoja na hayo mmweza kukubali mwaliko wetu na kuja kushiriki katika ufunguzi wa Maonesho haya. ***Nawashukuru Sana.***

Mheshimiwa Mgeni Rasmi,

Natoa pongezi na shukrani zangu za dhati kwa kamati ya maandalizi ambayo ilijumuisha wataalamu kutoka mifuko na programu mbalimbali za uwezeshaji na wataalamu kutoka Mkoa wa Singida kwa kazi nzuri waliyofanya bila kuchoka na kuhakikisha Maonesho haya yanafanyika kama yalivyopangwa. Kwa kipekee napenda kuchukua fursa hii kuwashukuru wadhamini wa Maonesho haya na kipekee natoa shukurani za dhati kwa wakuu wa Taasisi zinazosimamia mifuko na program za uwezeshaji za Serikali na sekta binafsi pamoja na wakuu wa Taasisi nyingine wezeshi kwa michango yao ya hali na mali katika kukuza uwezeshaji na kufanikisha Maonesho haya.

Mheshimiwa Mgeni Rasmi,

Kwa miaka mingi Serikali imekuwa ikifanya juhudi mbalimbali za kuwawezesha wananchi kiuchumi kwa lengo la kujenga uchumi na kuwaondoa wananchi katika umaskini. Juhudi hizo ni pamoja na kuanzisha mifuko na program za uwezeshaji mbalimbali kwa lengo la kutoa mikopo au dhamana ya mikopo kwa wananchi kwa masharti nafuu, kutoa ruzuku pamoja na kuweka mazingira wezeshi kwa wananchi ili waweze kukopesheka au kuhudumiwa na wadau wengine.

Mpaka sasa Baraza linaratibu Jumla ya Mifuko ya Uwezeshaji na Programu 72 ambayo 62 ipo Serikalini na 10 ipo Sekta binafsi, hivyo Lengo kuu la Maonesho haya ni kutoa uelewa wa fursa za Mifuko kwa Wananchi ambapo ilionekana mifuko mingi haifahamiki kwa wananchi hivyo kuchelewesha kufikisha huduma za uwezeshaji kwa wananchi

Mheshimiwa Mgeni Rasmi,

Maonesho haya ya saba ya mifuko na programu za uwezesaji katika Kanda ya Kati yamehusisha Mikoa ya Singida, Tabora na Dodoma lakini pia Mikoa mingine ya jirani imeshiriki kama Manyara, Shinyanga na Dar es Salaam. Maonesho ya kwanza yalifanyika mwaka 2017 katika Kanda hii hii ya Kati iliyohusisha Mkoa wa Dodoma, Singida na Tabora, lakini yalifanyikia katika Mkoa wa Dodoma; Maonesho ya pili yalifanyika mwaka 2018 katika Kanda ya Nyanda za Juu iliyohusisha Mkoa wa Iringa, Mbeya, Njombe, Rukwa, Ruvuma na Songwe; Maonesho ya tatu yalifanyika Mwaka 2019 katika Kanda ya Ziwa na yalikusisha Mkoa wa Geita, Kagera, Mara, Mwanza, Simiyu na Shinyanga; Maonesho ya nne yalifanyika mwaka 2021 katika Kanda ya Kaskazini iliyohusisha Mkoa wa Arusha, Kilimanjaro, Manyara na Tanga; Maonesho ya Tano yalifanyika mwaka 2022 katika kanda ya Mashariki iliyohusisha Mkoa wa Morogoro, Pwani, Dar es Salaam, Lindi na Mtwara na Maonesho ya sita yalifanyika mwaka 2023 katika kanda ya Magharibi iliyohusisha Mikoa ya Kigoma na Katavi.

Mheshimiwa Mgeni Rasmi,

Maonesho haya yana Kaulimbiu isemayo:“ **SHIRIKI UCHAGUZI WA SERIKALI ZA MITAA UNUFAIKE NA FURSA ZA UWEZESHAJI**” ambayo inaakisi kipindi hiki cha sasa tunapoelekea kwenye uchaguzi wa Serikali za Mitaa kuwahamasisha wananchi kushiriki kwenye uchaguzi ili kupata viongozi bora ambao watakuwa chachu ya kusimamia shughuli za kiuchumi na kuhakikisha wananchi wote wananufaika na fursa za uwezesaji.

Mheshimiwa Mgeni Rasmi,

Maonesho haya yanategemea kumalizika tarehe 14 Septemba na katika wiki hii tunategemea kuwa na shughuli za kutangaza fursa za mifuko hii pamoja na

Taasisi nyingine wezeshi, Kutoa mikopo kwa wajasiriamali, kuuza bidhaa za wajasiriamali pamoja na kutoa mafunzo ya uendelezaji biashara kwa wajasiriamali.

Miongoni mwa matokeo yanayotarajiwa kutokana na Maonesho haya ni: kukuza uelewa wa wananchi walio wengi kuhusu kuwepo kwa mifuko na programu za uwezeshaji; kuongezeka kwa utamaduni wa kujiwekea akiba na kuwekeza katika miradi ya kiuchumi yenye kuleta faida; na kuongeza hamasa kwa wananchi kutafuta vigezo vya kukopesheka ikiwa ni pamoja na kujiunga kwenye vikundi vya kiuchumi kama SACCOS na VICOBA na Kuwakutanisha wajasiriamali na watoa huduma mbalimbali wa Serikali na binafsi watakaosaidia kuongeza thamani na kukuza biashara zao.

Mheshimiwa Mgeni Rasmi,

Kabla sijahitimisha hotuba yangu, naomba nichukue nafasi hii tena kuipongeza Ofisi ya Mkoa wa Singida, wananchi wa Mkoa wa Singida na wadhamini wa Maonesho kwa kufanikisha Maonesho ya Saba ya Mifuko na Programu za Uwezeshaji mwaka 2024. Sisi kama waratibu wa mifuko na programu za uwezeshaji tunakuhaidi kuwa tutaendeleza ushirikiano ili kuongeza shughuli za kiuchumi kwa lengo la kupunguza mzunguko wa umaskini katika jamii.

Mheshimiwa Mgeni Rasmi, baada ya kusema hayo, ninaomba kuwasilisha

Nawashukuru Sana kwa Kunisikiliza